

Implikasi Dasar Kolonial British Terhadap Pembentukan Komuniti di Kampung Baru Daerah Ulu Selangor 1948-1957

The Implication of British Colonial Act by Developing Community in New Village at Ulu Selangor 1948-1957

Mohammad Bukhari Badrol Hisham¹ & Khairi Ariffin²

^{1,2}Department of History, Universiti Pendidikan Sultan Idris, 35900 Tanjong Malim, Perak.

Email: m20151000948@siswa.upsi.edu.my

Abstrak

Pelaksanaan dasar kolonial British terhadap pembentukan rancangan penempatan di kampung baru Cina telah menimbulkan implikasi dan cabaran terhadap komuniti kampung baru Cina di Daerah Ulu Selangor pada tahun 1948-1957. Pendekatan kualitatif dengan reka bentuk analisis dokumen dan manuskrip telah digunakan dengan memperoleh sumber primer, iaitu dokumen dan manuskrip yang terdapat di Arkib Negara Malaysia seperti *file*, *Colonial Office* Ulu Selangor, *Annual Report*, dan keratan akbar. Kajian turut disokong oleh sumber kedua yang diperoleh dari perpustakaan Institut Pengajian Tinggi Awam yang terdapat di Malaysia. Kajian lapangan juga telah dilakukan dengan menemu bual individu serta tokoh-tokoh penting di kampung baru Cina. Hasil kajian ini telah mendapati penempatan semula komuniti di kampung baru Cina di daerah Ulu Selangor telah menghadapi pelbagai masalah dalam mengharungi kehidupan mereka. Kesimpulannya, pembentukan kampung baru Cina ini telah berjaya menyelesaikan masalah kolaborasi antara komuniti di kampung baru Cina dengan pihak komunis di daerah Ulu Selangor. Implikasi daripada kajian menunjukkan dasar kolonial British dalam pembentukan komuniti di kampung baru Cina telah membawa perubahan yang besar kepada kehidupan penduduk di kawasan penempatan semula di daerah Ulu Selangor.

Kata kunci: Implikasi, dasar, kolonial British, kampung baru Cina, Ulu Selangor

Abstract

The implementation of the British Colonial Act towards the new settlement in the Chinese new village has raised several implication and challenges to the community of Chinese new village at Ulu Selangor from 1948 until 1957. Qualitative approaches with document and manuscript analysis have been used by obtaining the primary source which are documents and manuscript from Malaysia national archives, such as file, annual report from the colonial office of Ulu Selangor and newspaper articles. The research was also supported from secondary resources from the local higher institution libraries in Malaysia. Field research was carried out by interviewing individuals and local figures from the new village. The results from the research showed that the Chinese in the new village at Ulu Selangor had faced various problem in their lives. In conclusion, the new settlement for the Chinese in Ulu Selangor had overcome the joint forces problems between the villagers with the Malayan communist arm force at Ulu Selangor. The impact of the research showed that the British colonial act to develop a new village community for Chinese in Ulu Selangor had led to vast changes in the lives of the new settlement community in the district of Ulu Selangor.

Key Word: Impact of British colonial act, New Chinese Village, Ulu Selangor

Pengenalan

Penubuhan penempatan kampung baru Cina merupakan sebuah dasar penempatan semula penduduk yang telah dibentuk oleh kolonial British melalui rancangan Briggs. Pembentukan penempatan semula kampung baru Cina merupakan satu usaha daripada pihak kolonial British dalam menyekat hubungan antara komuniti Cina dengan pihak komunis. Langkah pembentukan kampung baru ini merupakan tindakan tegas pihak kolonial British sebagai satu strategi mengembalikan keamanan dan menjaga kepentingan mereka di Tanah Melayu. Keganasan yang telah dilakukan oleh anggota Parti Komunis Malaya (PKM) telah menggugat kepentingan kolonial British di Tanah Melayu yang telah

mengakibatkan keadaan huru-hara. Demi menjaga kepentingan kolonial British, undang-undang darurat diistiharkan pada tahun 1948. Penempatan semula komuniti kampung baru Cina di daerah Ulu Selangor (kini dikenali dengan nama Hulu Selangor) telah mendatangkan kesan besar kepada komuniti Cina. Pelbagai isu dan cabaran telah dihadapi oleh komuniti Cina dalam mengharungi dasar yang telah dilaksanakan oleh kolonial British setelah pemindahan ke sebuah penempatan semula kampung baru.

Latar Belakang

Pembinaan kampung baru Cina merupakan satu langkah yang telah diambil oleh pihak kolonial British semasa zaman darurat di Tanah Melayu. Daerah Ulu Selangor merupakan antara daerah yang telah terlibat secara langsung dalam pemberontakan komunis dan telah disenarai sebagai kawasan hitam akibat berlakunya keganasan komunis (British Adviser's, 1954c). Daerah ini menjadi antara kawasan tumpuan utama pihak komunis kerana daerah ini merupakan antara laluan pintu masuk yang dapat menghubungkan negeri Perak dengan negeri Pahang. Daerah Ulu Selangor merupakan daerah yang terbesar daripada sembilan buah daerah di negeri Selangor. Daerah ini merangkumi beberapa mukim, iaitu Ulu Bernam, Kalumpang, Kuala Kalumpang, Sungai Gumut, Sungai Tinggi, Kerling, Ampang Pecah, Buluh Telor, Pertak, Rasa, Batang Kali, Ulu Yam, Rawang dan Serendah.

Daerah Ulu Selangor merupakan antara daerah yang terlibat secara langsung dalam pelaksanaan dasar kolonial British dalam menempatkan semula penduduk yang tinggal di kawasan setinggan ke kawasan dalam sebuah penempatan semula kampung baru. Pembentukan kawasan kampung baru Cina di daerah Ulu Selangor merupakan satu strategi penempatan semula komuniti Cina ke dalam kawasan penempatan yang lebih tersusun dan mudah untuk dikawal. Rancangan penempatan semula masyarakat setinggan Cina ini telah ditetapkan oleh pentadbiran kolonial British bermula daripada penubuhan Jawatankuasa Setinggan 1948 dan diteruskan melalui pelaksanaan rancangan Briggs. Antara kawasan penempatan semula kampung baru yang telah diwujudkan di daerah Ulu Selangor ialah Kampung Baru Air Panas Kerling, Kampung Baru Rasa, Kampung Asam Kumbang, Kampung Baru Stesyen dan Kampung Baru Gurney, Kampung Baru Bukit Chandang, Kampung Baru Damai Serendah, Kampung Baru Kundang, Kampung Baru Rawang, Kampung Baru Kuang dan Kampung Baru Sejangtung.

Pembentukan kawasan penempatan semula kampung baru ini dilaksanakan bertujuan untuk menyekat komuniti Cina daripada menyalurkan sebarang bentuk bantuan kepada gerakan komunis melalui gerakan "*Min Yuen*" atau tentera rakyat (Colonial Office, 1952b). Gerakan "*Min Yuen*" merupakan satu gerakan yang dianggotai oleh rakyat biasa majoriti terdiri daripada kalangan masyarakat Cina yang menunjukkan simpati kepada gerakan komunis. Gerakan ini memainkan peranan dalam mewujudkan hubungan di antara pihak PKM dengan golongan rakyat (Colonial Office, 1952b). Gerakan ini telah dikenal pasti sebagai nadi utama yang membolehkan gerakan komunis terus bergerak aktif dalam meneruskan dasar perjuangan mereka (Colonial Office, 1952a). Gerakan *Min Yuen* bergerak aktif di kawasan penempatan setinggan yang terletak di kawasan luar bandar dan kawasan pinggir hutan yang telah muncul sejak zaman kemelesetan ekonomi pada tahun 1930 terutama ketika dalam pendudukan Jepun. Di samping itu, penubuhan penempatan semula ini bertujuan untuk melindungi masyarakat Cina yang menerima ancaman keganasan daripada PKM disebabkan mereka tidak memberikan kerjasama kepada gerakan komunis.

Proses penempatan semula setinggan Cina di kawasan daerah Ulu Selangor telah menyebabkan berlakunya proses pemindahan secara besar-besaran penduduk setinggan Cina yang tinggal di kawasan pinggir hutan. Masyarakat setinggan ini telah diarahkan berpindah dan telah ditempatkan di kawasan yang terkawal dikelilingi pagar dan kawad berduri. Usaha kolonial British dalam menghapuskan sebarang bentuk bantuan yang dapat disalurkan kepada pihak komunis telah menyebabkan penduduk setinggan Cina menghadapi pelbagai cabaran dalam meneruskan kehidupan di kawasan penempatan semula kampung baru (Ho, 2004).

Implikasi pembentukan penempatan komuniti kampung baru Cina amat berkait rapat dengan peristiwa darurat yang berlaku di Tanah Melayu. Banyak kajian berkaitan dengan penempatan semula komuniti masyarakat kampung baru Cina di Ulu Selangor seperti dalam penulisan Lim (1950) dan penulisan Ho (2004) yang telah menyentuh secara umum terhadap tajuk kajian. Kajian-kajian ini telah

menerangkan latar belakang secara umum asas pembentukan komuniti di kampung baru Cina dalam pelaksanaan rancangan Briggs dan permasalahan dalam menghadapi ancaman gerakan komunis di Tanah Melayu. Namun begitu, penulisan ini hanya menyentuh secara umum mengenai kampung baru Cina tanpa menyentuh secara khusus mengenai implikasi dasar kolonial British pembentukan kampung baru terhadap komuniti Cina di kawasan Ulu Selangor.

Penulisan seorang pegawai Inggeris Cloake (1985) telah memaparkan maklumat terperinci daripada fail Pejabat Perang dan Pejabat Tanah Jajahan di London. Dalam penulisan ini, beliau menyentuh berkenaan setinggian Cina sebelum darurat 1948. Penyelidik dapat memahami maklumat berkaitan dengan tindakan pihak kolonial British dalam usaha menyekat gerakan komunis. Namun begitu, penulisan ini tidak menyatakan secara khusus mengenai implikasi pembentukan kampung baru di daerah Ulu Selangor. Selain itu, dalam penulisan Markandan, (1955) juga telah menyentuh mengenai tajuk yang mempunyai perkaitan. Dalam penulisan ini, penyelidik telah menyentuh mengenai masalah darurat yang telah menyebabkan kebimbangan pihak kolonial British terhadap kolaborasi dan sokongan yang diberikan oleh komuniti Cina kepada gerakan komunis.

Selain itu, kandungan penulisan Nyce (1973) juga menyentuh terhadap tajuk kajian yang dikaji oleh penyelidik. Penulisan beliau ini telah menghurai asas pembentukan kampung baru Cina di Tanah Melayu semasa zaman darurat. Beliau telah menyentuh secara terperinci latar belakang pembentukan kampung baru Cina di Tanah Melayu semasa zaman darurat pada tahun 1948 sehingga tahun 1960. Melalui kajian beliau ini, pengkaji dapat mengetahui gambaran awal secara umum pembentukan kampung baru Cina di Tanah Melayu kesan daripada peristiwa darurat. Penulisan ini juga dapat memberikan pemahaman berkaitan implikasi dasar British terhadap pembentukan kawasan penempatan semula kampung baru.

Isu dan Permasalahan

Pembentukan komuniti kampung baru di Ulu Selangor merupakan satu perancangan yang telah dirangka untuk menyekat hubungan di antara komuniti Cina dengan gerakan Parti Komunis Malaya. Dalam usaha mengatasi dan menyekat pergerakan komunis setelah darurat diistiharkan, Leftenan Jeneral Sir Harold Rowdon Briggs telah melaksanakan tindakan pencegahan dalam tindakan pelan yang dikenali sebagai Rancangan Briggs dengan cara memindahkan penduduk setinggian Cina dari kawasan-kawasan terpencil dan kawasan penempatan setinggian yang bertaburan ke satu kawasan perkampungan baru yang berkelompok (Colonial Office, 1951) Namun begitu, pembentukan komuniti kampung baru telah menimbulkan isu-isu dalaman terhadap komuniti Cina di daerah Ulu Selangor. Komuniti kampung baru telah menghadapi masalah berkaitan sekatan makanan, masalah dalam menjalankan kegiatan ekonomi pertanian, dan kelemahan aspek pertahanan di kawasan kampung baru. Di samping itu, komuniti kampung baru Cina juga menghadapi masalah penempatan dan pemilikan tanah serta masalah penyebaran wabak penyakit. Komuniti Cina juga terhimpit dengan sekatan terhadap kebebasan dalam melaksanakan aktiviti akibat undang-undang darurat memberikan kesan kepada komuniti kampung baru.

Metodologi Kajian

Analisis data telah dilakukan menggunakan kaedah penyelidikan kualitatif dengan reka bentuk analisis dokumen dan manuskrip menggunakan penyelidikan bahan Arkib Negara Malaysia. Kajian telah dibuat di Arkib Negara dengan membuat rujukan dan analisis sumber primer seperti fail. Fail yang dianalisis seperti fail Setiausaha Kerajaan Negeri Selangor, laporan tahunan dan fail rekod kolonial British. Selain itu, surat-menyurat seperti surat daripada Residen British kepada Menteri Besar Selangor dan juga surat-surat persendirian telah dianalisis. Keratan akhbar juga digunakan dalam kajian ini seperti akbar *The Times* mengenai peristiwa darurat. Penggunaan sumber kedua juga digunakan untuk menyokong kajian ini dengan membuat kajian di Perpustakaan Universiti Pendidikan Sultan Idris, Perpustakaan Universiti Malaya, dan Perpustakaan Universiti Kebangsaan Malaysia. Kajian lapangan juga telah dilakukan dengan menemu bual individu serta tokoh-tokoh penting penduduk yang tinggal di kawasan penempatan kampung baru di kawasan daerah Ulu Selangor. Bagi langkah terakhir, penilaian data dan dapatan akan dibuat secara analitikal serta tafsiran secara hermeneutic. Penelitian terhadap kajian terdahulu juga digunakan sebagai sumber persejajaran

berkaitan dengan kajian ini oleh pengkaji terdahulu. Bahan tersebut digunakan sebagai bahan kajian dan analisis oleh pengkaji untuk melihat koheran kajian ini seperti buku, jurnal dan tesis.

Dapatan Kajian

Dalam usaha pihak kolonial British membina penempatan semula kampung baru Cina di daerah Ulu Selangor, pelbagai isu dan cabaran telah timbul dalam komuniti kampung baru Cina. Tindakan keras telah dilaksanakan oleh pihak kolonial British dalam usaha untuk mengumpul dan memindahkan masyarakat Cina dalam satu penempatan kampung baru. Kaedah pemindahan penduduk setinggian Cina yang dilakukan secara paksaan telah menimbulkan perasaan benci masyarakat kepada kolonial British sehingga menyukarkan rancangan untuk menghalang komuniti Cina daripada terus menyalurkan bantuan kepada pihak komunis.

Most of the New Villages are the result of inadequate planning coupled with a sense of urgency. Very little has been done to improve or remedy their shortcomings. In fact, until the arrival of General Sir Gerald Templer in Malaya, they were known as resettlement areas. The change of name, however, has not brought a change in the situation, for these villages remain what they were-resettlement areas. (Markandan, 1955, ms. 19)

Pembinaan penempatan semula kampung baru di daerah Ulu Selangor telah dirangka dan dibina dalam keadaan tergesa-gesa tanpa perancangan yang rapi. Proses pemindahan penduduk di kawasan penempatan semula ini secara terburu-buru telah mendatangkan kesukaran kepada masyarakat. Pendekatan dengan strategi memenangi semula hati dan minda komuniti Cina ini dilihat sebagai jalan penyelesaian terbaik agar komuniti Cina melihat bahawa pihak kolonial British sentiasa menjaga kebajikan masyarakat Cina. Kolonial British telah menyediakan pelbagai infrastruktur dalam kampung baru Cina untuk memenangi hati masyarakat. Namun begitu, masih terdapat isu-isu dan masalah yang timbul dalam komuniti kampung baru Cina. Pembentukan kampung baru Cina merupakan satu strategi Briggs untuk mengumpul komuniti Cina ke dalam penempatan terkawal yang dapat memutuskan hubungan antara pihak komunis dengan masyarakat. Tindakan penempatan berpusat ini secara langsung telah mendatangkan masalah kepada komuniti Cina. Mereka terpaksa mengharungi kehidupan yang sukar dalam membina semula kehidupan dalam penempatan baru.

Jika dilihat di daerah Ulu Selangor, proses pemindahan telah dilaksanakan oleh pihak tentera setelah mendapat arahan dan notis daripada pihak pentadbiran British negeri Selangor. Arahan pemindahan ini terpaksa dipatuhi oleh semua masyarakat kerana pihak tentera telah mengambil tindakan mengepung kawasan setinggian dan mengarahkan penduduk berpindah dalam kadar segera. Proses pemindahan penduduk telah dijalankan secara mengejut pada waktu subuh tanpa notis awal kepada penduduk di kawasan Batang Kali, Ulu Yam dan Kerling (Markandan, 1955). Arahan perpindahan ini dilaksanakan bertujuan mengelakan masyarakat Cina di kawasan setinggian yang terlibat dengan kegiatan komunis sempat melarikan diri ke dalam hutan yang berhampiran (Kernal, 1964). Arahan perpindahan ini tidak memberikan peluang masyarakat Cina untuk membuat sebarang pilihan. Keadaan ini telah menyebabkan masyarakat setinggian Cina terpaksa mengumpul barang dan harta mereka untuk dipindahkan ke kawasan kampung baru dalam jangka masa yang amat singkat. Penduduk yang mengingkari arahan pihak keselamatan akan ditangkap (Central Intelligence Agency, 1972).

Operasi pemindahan penduduk di Ulu Selangor ini telah mendatangkan masalah kepada masyarakat kerana tidak bersedia dan mempunyai masa yang cukup untuk berpindah. Akibatnya, mereka tidak sempat untuk mengemas barang keperluan, mengumpul binatang ternakan dan hasil pertanian kerana pasukan keselamatan mengarahkan golongan setinggian membawa barang-barang yang dianggap penting sahaja. Banyak barangan yang tidak dibawa ketika dalam pemindahan. Proses pemindahan ini telah menjadikan pihak penduduk mengalami kerugian yang besar. Setelah segala barang penduduk selesai dipindahkan, masyarakat Cina telah dibawa ke kampung baru. Penduduk setinggian akan didaftarkan di kampung dan setiap keluarga akan diberikan tanah seluas 1/6 ekar bagi mendirikan rumah dengan keluasan 40 kaki x 100 kaki untuk setiap lot rumah (Markandan, 1955).

Di atas tanah ini juga, masyarakat dibenarkan untuk bercucuk tanam dan membela binatang ternakan (British Adviser's, 1954a). Namun begitu, tanah yang diperuntukkan kepada masyarakat Cina terlalu sempit berbanding semasa mereka tinggal di kawasan setingan (British Adviser's, 1954a). Masyarakat Cina tidak dapat menjalankan kegiatan ekonomi mereka di kawasan tanah yang telah diperuntukkan menyebabkan aktiviti ekonomi mereka sangat terbatas. Komuniti kampung baru juga menghadapi masalah untuk mendirikan rumah. Pihak British hanya menyediakan tapak rumah, manakala pembinaan rumah adalah bergantung kepada usaha penduduk. Dana kewangan yang disediakan oleh pihak British kepada penduduk amat kecil iaitu sebanyak \$70-100 bagi sebuah rumah. Peruntukan yang kecil ini menyebabkan kesusahan kepada penduduk untuk membeli bahan binaan bagi mendirikan rumah. Kesusahan komuniti kampung baru bertambah apabila kos barang binaan telah meningkat kerana pertambahan permintaan terhadap barangan tersebut. Komuniti kampung baru terpaksa bekerjasama untuk membina rumah kediaman mereka. Keadaan ini menyebabkan rumah yang dibina dalam keadaan serba kekurangan.

Masalah Sekatan Makanan

Setelah masyarakat Cina ditempatkan di kawasan penempatan semula kampung baru, pihak British telah mengenakan catuan makanan. Catuan makanan dilaksanakan kerana penduduk komuniti kampung baru Cina masih membekalkan barang makanan kepada pihak komunis (Central Intelligence Agency, 1972). Dasar catuan makanan seperti barangan beras, gula, tepung dan susu telah menyebabkan barang keperluan tidak mencukupi sehingga masyarakat telah mengalami masalah kekurangan makanan (British Adviser's, 1954c). Catuan beras telah dikenakan kepada semua kampung baru yang terletak dalam kawasan daerah Ulu Selangor. Penduduk hanya dibenarkan membeli makanan yang telah dihadkan oleh British di kedai tertentu (British Adviser's, 1954c).

Bagaimanapun, bekalan makanan didapati masih boleh disalurkan keluar kepada pihak komunis (Short, 1974). Keadaan ini menyebabkan pihak kolonial British telah melarang beras yang belum dimasak dijual kepada penduduk kampung baru. Penduduk dipaksa membeli beras yang telah dimasak di bilik memasak yang disediakan di kampung baru. Sekatan penjualan beras ini menyebabkan penjualan beras terpaksa dihentikan (Selangor Secretariat, 1953c). Melalui *Comuniti Cooking Sistem*, masalah penyaluran bekalan makanan terutama beras kepada komunis dapat disekat. Pihak British telah melaksanakan "*food restricted area*" di setiap kampung baru daerah Ulu Selangor. Peraturan ini membolehkan pihak pasukan keselamatan mengawal segala pergerakan keluar masuk bekalan makanan di dalam kawasan kampung baru. Kawasan di sekitar kampung baru di Ulu Selangor dikenakan sekatan dan pemeriksaan oleh pihak pasukan keselamatan di pintu atau pagar utama kampung-kampung baru (British Adviser's, 1952). Pihak pasukan keselamatan berkuasa untuk meneliti dan menyelongkar segala barang ataupun makanan yang dibawa oleh penghuni atau pengunjung yang keluar atau masuk dari kawasan kampung baru. Pemeriksaan ini bertujuan untuk memastikan penduduk kampung baru tidak membawa atau menyeludup keluar bekalan makanan untuk diserahkan kepada pihak komunis. Langkah ini terpaksa dikenakan oleh kolonial British kerana kebanyakan daripada pengganas komunis mempunyai ikatan kekeluargaan dengan penghuni kampung baru Cina.

Pihak pasukan keselamatan sentiasa membuat pemeriksaan ketat terhadap pergerakan keluar masuk penduduk di pintu-pintu kawasan kampung baru. Penduduk kampung baru juga hanya dibenarkan membawa bekalan air kosong sahaja ke tempat kerja di kawasan estet-estet getah dan kebun sayur. Penghuni kampung baru tidak boleh membawa bekalan makanan semasa bekerja. Peraturan ini mendatangkan masalah kepada masyarakat kerana terpaksa bekerja dalam keadaan lapar sehingga menjejaskan pekerjaan mereka. Oleh itu, kebanyakan daripada penoreh getah ini terpaksa bekerja dalam keadaan letih dan lapar sehingga menyebabkan pengeluaran hasil getah di kebanyakan estet mula terjejas (British Adviser's, 1953). Ancaman dan perasaan takut masyarakat terhadap kegiatan komunis menyebabkan pengeluaran hasil getah telah merosot. Kebimbangan ini pernah disuarakan sendiri oleh para pemilik ladang atau estet getah (Stubbs, 1974). Keadaan ini bukan sahaja merugikan pemilik ladang, tetapi telah menyebabkan ekonomi masyarakat terjejas.

Masalah Kegiatan Ekonomi Pertanian

Dalam meneruskan kehidupan di kawasan kampung baru, penduduk komuniti kampung baru telah menghadapi masalah dalam menjalankan kegiatan ekonomi mereka. Dalam tinjauan (British Adviser's, 1953) yang dilakukan di Kampung Baru Rasa dan Kampung Baru Kundang, terdapat masalah pengangguran yang berlaku dalam kalangan penduduk. Keadaan ini berlaku akibat ancaman yang diterima akibat kegiatan keganasan komunis, ancaman di kawasan lombong biji timah dan kejatuhan harga getah (British Adviser's, 1953). Taraf kehidupan penduduk pula bertambah sukar akibat sekatan makanan yang telah dilaksanakan. Tekanan hidup yang dihadapi penduduk telah menyebabkan masyarakat cuba untuk menyesuaikan diri dengan melakukan kegiatan pertanian dan penternakan. Penduduk di kampung baru telah dikurniakan tanah oleh pihak kolonial British negeri Selangor untuk mendirikan rumah, menjalankan kegiatan bercucuk tanam dan menternak binatang (British Adviser's, 1953). Namun, masalah kesempitan ruang telah dihadapi oleh penduduk kampung dalam menjalankan kegiatan pertanian dan menanam pelbagai jenis tanaman.

In the New Villages, however, the settler is allotted a piece of land that rarely can hold more than his house and a few plots of vegetables. The New Villages have been kept to a minimum size to facilitate better security measures, and keep down the expenditure, and the settler has suffered as a consequence. Even in those villages where arable land is available immediately outside the perimeter fence the settler cannot expect more than three-quarters of an acre of land. (Markandan, 1955, ms. 17)

Tidak dinafikan, pihak kolonial British telah menyediakan peruntukan tanah untuk pembinaan tapak pertanian seluas 1/4 hingga 3 ekar bagi pembinaan kebun-kebun sayur (British Adviser's, 1953). Biasanya tanah ini terletak sejauh 1 sehingga 3 batu dari kawasan kampung baru. Penyediaan tanah ini sangat terhad untuk pelaksanaan aktiviti pertanian penduduk kampung baru (British Adviser's, 1953). Masalah mendapatkan tanah pertanian berlanjutan apabila usaha untuk mendapatkan tanah terpaksa melalui pelbagai prosedur serta mengambil masa yang panjang. Para petani juga tidak memperoleh kebebasan dalam melakukan aktiviti pertanian kerana terdapat larangan dalam aktiviti penanaman. Perasan benci terhadap pentadbiran kolonial British semakin bertambah apabila kebanyakan daripada tanaman mereka sering diancam oleh serangan babi hutan, tikus dan juga serangga perosak seperti semut dan belalang. Penduduk juga berasa takut untuk menjalankan kegiatan ekonomi akibat ancaman yang diterima daripada pihak komunis (British Adviser's, 1953). Situasi ini menyebabkan mereka terpaksa hidup dalam kesusahan. Keadaan ini menyebabkan masyarakat Cina melakukan aktiviti pertanian dengan menanam sayur di sekeliling tapak rumah untuk memenuhi keperluan keluarga. Oleh itu, mereka sering menyalahkan pentadbiran British di atas segala kesukaran dan kerugian yang mereka alami semenjak ditempatkan di kawasan kampung baru.

Kelemahan Aspek Pertahanan

Dalam aspek pertahanan dan kawalan keselamatan yang dilaksanakan di kampung baru, hampir semua kampung baru di daerah Ulu Selangor mempunyai sistem pertahanan atau kawalan keselamatan yang agak lemah seperti penempatan semula kampung Baru Sejahtung (British Adviser's, 1953). Kawasan ini hanya mempunyai sebuah pondok polis sahaja yang terdiri daripada seorang Sarjan, seorang koperal, 13 orang konstabel khas (Central Intelligence Agency, 1972). Akibat daripada kelemahan aspek kawalan keselamatan, penduduk di kawasan ini terpaksa memberi bantuan makanan dan maklumat kepada pihak komunis. Bekalan ini terpaksa diberikan agar nyawa mereka tidak diancam oleh pengganas komunis yang aktif di kawasan ini. Aktiviti penyeludupan komunis terus bergerak aktif di sekitar kawasan kampung baru apabila tidak wujud hubungan kerjasama yang erat antara penduduk kampung dengan pasukan keselamatan. Kawalan keselamatan yang agak lemah di kawasan kampung baru menyebabkan penduduk kampung baru hidup dalam ketakutan. (Markandan, 1955) Mereka sering menjadi mangsa ancaman, penculikan dan pembunuhan sekiranya tidak membantu perjuangan komunis.

Kejadian pembunuhan, penculikan dan ugutan terhadap kampung baru sukar dikawal apabila kebanyakan daripada anggota polis dan juga 'home guard' yang terdapat di kawasan ini tidak cekap dan terlatih bagi mengawal dan mempertahankan keselamatan penduduk kampung baru (Central Intelligence Agency, 1972). Kelemahan kawalan keselamatan memudahkan pihak komunis menyusup masuk ke dalam kawasan kampung baru. Penyusupan komunis tetap berjaya dilakukan walaupun anggota polis dan 'home guard' menjalankan rondaan dan kawalan setiap hari. Keadaan bertambah buruk apabila terdapat segelintir pasukan *home guard* yang ditugaskan membantu anggota polis tidak terlatih dan tidak mempunyai senjata api yang cukup dalam menjalankan tugas mereka (British Adviser's, 1951b). Bagi memudahkan lagi penyusupan, pengganas komunis sering menggunakan kad pengenalan yang dicuri daripada penduduk kampung baru menyebabkan penduduk bimbang dengan kejadian kehilangan kad pengenalan (British Adviser's, 1952). Pihak British pula akan mengambil tindakan tegas dengan menangkap penduduk jika hilang kad pengenalan atau kad pengenalan digunakan oleh pihak pengganas bagi kegiatan penyusupan.

Walaupun pihak kolonial British menyediakan pagar duri, namun pagar duri tersebut tidak dapat menghalang ancaman komunis sepenuhnya kerana pihak komunis telah merosakkan pagar tersebut untuk menyelusup masuk. Pagar ini juga tidak dapat berfungsi jika polis dan *home guard* tidak melakukan ronda dengan cekap dan sempurna di sepanjang pagar itu (Markandan, 1955). Terdapat juga pagar kampung yang tiada pengawal bertugas menjaga pintu masuk. Kelemahan kawalan keselamatan ini telah menyebabkan pihak komunis berjaya menyusup masuk ke dalam kampung baru.

In some of the New Villages I visited I often found the gates wide open without any security guards. At night the entire perimeter fence is rarely guarded. There is very little to deter a number of communists from walking in through the main gate during the day, disguised as tappers, or crawling through the fence in some unguarded spot at night. (Markandan, 1955 ms. 11).

Pihak komunis yang berjaya menyelusup masuk ke dalam penempatan semula kampung baru telah menyebarkan propaganda memburukkan pentadbiran kolonial British. Keadaan ini menyebabkan penduduk komuniti kampung baru Cina menjadi keliru dan tidak tahu untuk menyokong pihak komunis ataupun pihak British. Akhirnya, terdapat segelintir penduduk yang membekalkan bantuan makanan dan maklumat kepada pihak komunis. Masyarakat Kampung baru juga mula hilang kepercayaan kepada pentadbiran British kerana kegagalan dalam menjamin keselamatan penduduk.

In the rubber estate he might meet a terrorist who threatens to kill him if he does not bring food. Valuing his life more than anything else, he carries out the instructions of the terrorist. If he is brave enough and has been convinced of the benefits of democracy he might inform the authorities. But, while he has some measure of protection within the village, he has none outside it. (Markandan, 1955,ms. 11).

Walaupun dalam kawasan kampung baru diberi kawalan keselamatan, namun ancaman daripada pihak komunis tetap berlaku terhadap penduduk. Penduduk yang keluar untuk menjalankan kegiatan ekonomi di kawasan estet dan ladang telah menerima ancaman daripada pihak komunis yang bersembunyi di kawasan semak dan pinggir hutan. Penduduk diugut supaya menyerahkan makanan kepada pihak komunis. Kegagalan penduduk menyerahkan makanan akan menyebabkan mereka mendapat ancaman bunuh.

Masalah Penempatan dan Pemilikan Tanah

Taraf pemilikan tanah dalam penempatan kampung baru Cina merupakan satu isu utama dalam kampung baru Cina di daerah Ulu Selangor. Dalam proses pembinaan kampung baru Cina di daerah Ulu Selangor, pihak British telah menyediakan tanah untuk penempatan semula masyarakat di

kampung baru. Setiap keluarga mendapat tanah 1/6 ekar dan tanah pertanian seluas 1/4 hingga tiga ekar untuk kegiatan ekonomi (British Adviser's, 1954c). Namun, di kawasan kampung baru Ulu Selangor, terdapat sesetengah penduduk yang tidak memiliki tanah. Oleh yang demikian, pentadbiran British di negeri Selangor telah memutuskan untuk memberi tanah kepada mereka.

Jadual 1: Pemberian Lot Tanah Kepada Penduduk Kampung Baru

Kampung Baru	Jumlah lot
Ampang Pechah	197
Kampong Bukit Rasa	58
Kalumpang	423
Rawang	254
Kerling	246

Sumber: British Adviser's office Selangor. (1953). Employment In New Villages. Survey of Employment in New Villages In Selangor.

Berdasarkan jadual 1, pihak kolonial British telah menyediakan 197 lot tanah kepada penduduk Kampung Baru Ampang Pechah, 58 lot tanah kepada penduduk Kampong Bukit Rasa, 423 lot tanah kepada penduduk Kampung Baru Kalumpang, 254 lot tanah kepada penduduk Kampung Baru Rawang dan 246 lot tanah kepada penduduk Kampung Baru Kerling (British Adviser's, 1954b). Namun begitu, penduduk kampung baru yang memiliki tanah daripada pihak British terpaksa dikenakan beberapa syarat. Antara syarat yang dikenakan oleh pihak kolonial British ialah hak menduduki tanah dengan tempoh selama 30 tahun. Selepas tempoh itu tamat, penduduk dikendaki memperbaharui. Bayaran juga akan dikenakan kepada mereka apabila kerja memperbaharui lesen hak milikan tanah.

Selain itu, pihak British menetapkan syarat, iaitu tanah tersebut tidak boleh dipindah milik, disewa ataupun dijual dalam sebarang cara kecuali mendapat kebenaran daripada "*Collector of land revenue*" di kawasan penduduk (British Adviser's, 1953). Pemilik tanah tidak boleh menggadaikan tanah milik mereka untuk mendapat wang pinjaman daripada orang awam. Penduduk kampung yang ingin memiliki tanah melalui cara ini terpaksa berhubung dengan Pegawai Tanah Negeri Selangor. Semua lesen hak milik tanah dikeluarkan melalui beberapa tatacara yang perlu diikuti seperti membuat pembayaran tanah, memperoleh surat kebenaran menduduki tanah dan sukatan tanah oleh pegawai Jabatan Tanah Negeri Selangor (British Adviser's, 1954b). Peraturan tersebut telah dikenakan terhadap orang Cina yang memperoleh hak milik tanah untuk memastikan tanah tidak bertukar tangan kepada orang lain.

Pengurniaan ini diterima dengan baik oleh masyarakat, namun masalah telah timbul apabila pihak British masih gagal memastikan tahap pemilikan tanah tersebut. Penduduk kampung baru juga telah menghadapi masalah untuk mendapatkan pengiktirafan tanah. Terdapat juga tanah yang telah diperuntukkan kepada penduduk kampung baru memiliki taraf *Temporary Occupation Land* (TOL) (British Adviser's, 1954a). Taraf tanah TOL tersebut boleh diperbaharui pada setiap tahun. Setiap penduduk kampung baru mempunyai taraf TOL yang berlainan. Keadaan ini telah menyebabkan penduduk merasa ragu dan bimbang kerana takut dipindahkan atau dihalau pada masa akan datang (K.B. Selangor, 1963). Segelintir penduduk tidak mahu membuat pembayaran kerana tidak yakin terhadap status tanah kediaman mereka. Dalam tinjauan yang dilakukan oleh W.C.S. Corry dalam pemerhatian di kampung baru daerah Ulu Selangor:

13 New Villages are classified as "a" yet applications for title from NIL in 5 cases to 295 in case of Ampang Pechah. Is this because people forced to live in New Villages are reluctant to pay fees on titles or because they have no confidence in the permanency of some New Villages. (British Adviser's, 1954b, ms. 6).

Status tanah di kawasan kampung baru Ulu Selangor hanya terdapat 312 tanah kediaman yang bertaraf TOL (British Adviser's, 1954b). Manakala untuk tanah pertanian, penduduk kampung baru memerlukan sebanyak 1265 ekar namun hanya 880 ekar sahaja yang disediakan. Tiada sebarang

permohonan untuk tanah pertanian dibuat dan hanya 9 ekar tanah yang dilindungi oleh TOL. Dalam mendapatkan hak milik tanah orang Cina di kampung baru, pihak MCA telah memainkan peranan penting. Peranan tersebut tersebut dimainkan oleh pengerusi Sub-committee kebajikan MCA, Mr. Leung Ching (Selangor Secretariat, 1953b). Dengan daya usaha beliau, kerajaan negeri Selangor telah memberikan hak milikan tanah kepada orang-orang Cina. Terdapat empat kategori lot tanah yang diberikan kepada orang Cina (Selangor Secretariat, 1952c).

Jadual 2: *Kategori Hak Milik Tanah Orang-Orang Cina di Kampung Baru*

Bil.	Jenis lot	Premium	Sewa	Tempoh
1.	Kedai	\$5-\$10 satu lot	\$25-100 satu lot setahun	30 tahun
2.	Rumah	\$5-\$10 satu lot	\$10-25 satu lot setahun	30 tahun
3.	Pertanian	\$10 satu ekar	\$5 1 ekar setahun	30 tahun
4.	Istimewa	\$10 satu lot	-	30 tahun

Sumber: Selangor Secretariat, (1952c). Leaflet Re-alienation Policy In New Villages In Selangor.

Merujuk jadual 2, penempatan semula kampung baru Cina di daerah Ulu Selangor telah menimbulkan isu berkaitan pemilikan tanah kepada orang Melayu. Pembinaan kampung baru ini telah mengorbankan tanah milik individu, kerajaan dan tanah simpanan orang Melayu. Kampung baru yang dibina untuk orang Cina khususnya telah mendatangkan masalah kepada orang Melayu apabila mereka merasakan bahawa pengambilan tanah mereka ini hanya membawa kebaikan kepada orang Cina yang dianggap sebagai musuh mereka.

Semasa pembinaan kampung baru, terdapat tanah kepunyaan orang-orang Melayu yang telah diambil tanpa sebarang permohonan daripada pemilik tanah dan sebarang ganti rugi. Walaupun pihak kolonial British menabur janji lisan untuk membayar ganti rugi, tetapi janji tersebut tidak dilaksanakan. Selain itu, tanah-tanah badan swasta juga telah diambil untuk membina kampung baru. Kebanyakan tanah-tanah berkenaan telah di ambil melalui "*land acquisition enactment.*" Dengan mendapatkan tanah untuk rancangan penempatan semula secara paksaan, bayaran ganti rugi atau janji mulut, rancangan Briggs telah dapat dijalankan dengan lancar. Tindakan tersebut merupakan salah satu cara untuk membina kampung baru di Ulu Selangor tanpa sebarang masalah. Keadaan pemberian tanah ini kepada orang Cina menimbulkan masalah kaum di Ulu Selangor. Tindakan kolonial British yang mengambil tanah individu dan tanah simpanan Melayu ini telah merenggangkan hubungan orang Melayu dengan orang Cina.

Masalah Wabak Penyakit

Dalam menyekat masyarakat Cina dalam membantu pihak komunis, langkah pemindahan penduduk setinggan Cina di Ulu Selangor telah dilakukan secara tergesa-gesa. Pelaksanaan pemindahan penduduk asal ke kawasan kampung baru adalah diselia oleh pihak tentera. Keadaan ini menyebabkan pada awalnya infrastruktur kampung baru Cina terabai khusus berkait dengan kesihatan penduduk kampung baru. Kebanyakan sistem perparitan dan tandas di kampung baru daerah Ulu Selangor tidak teratur sehingga menyebabkan pelbagai jenis penyakit berjangkit tersebar di kawasan ini (British Adviser's, 1951a). Terdapat penduduk di Kampung Baru Kerling yang terkena wabak taun disebabkan sistem pembentungan yang tidak selaras. Penduduk kampung baru telah membuat perigi berdekatan dengan tandas. Tandas yang dibina tidak sistematik dengan lubang tandas yang cetek di sekitar rumah mereka menyebabkan penyakit taun dan cirit-birit telah merebak di kawasan kampung baru.

Persekitaran yang kurang bersih dan berhampiran dengan estet getah, hutan dan semak samun seperti Kampung Baru Gurney memburukan lagi keadaan kesihatan penduduk. Kawasan semak ini menjadi habitat pembiakan nyamuk tiruk menyebabkan penduduk kampung baru telah diserang demam malaria. (S-E.P.K 399-50, 1950) Penduduk tidak menjalankan usaha untuk membersihkan lalang serta semak yang tumbuh di sekitar kawasan kampung baru. Masalah demam malaria telah melanda masyarakat Kampung Baru Gurney dan Kampung Baru Cina Sejangtung, Kalumpang. Terdapat juga penduduk yang dijangkiti demam Malaria sehingga menyebabkan kematian. Selain itu juga, penduduk juga dijangkiti sakit kulit seperti tokak dan kudis buta disebabkan oleh kegiatan

penternakan babi yang dekat dengan rumah masyarakat Cina. (Markandan, 1955) Penyakit kulit ini bukan sahaja melanda masyarakat di daerah Ulu Selangor, tetapi telah melanda hampir semua kampung baru di Tanah Melayu.

When I visited them I found some suffering from skin diseases, and almost all are eloquent in voicing their grievances. (Markandan, 1955, ms. 15)

Faktor utama masalah penyakit ini kerana masalah bekalan air bersih dalam penempatan penduduk kampung baru. Selain itu juga, penyakit ini berpunca daripada haiwan ternakan seperti babi mengeluarkan najis berbau. Keadaan persekitaran yang kotor memudahkan penduduk terdedah dengan penyakit kulit dan taun. Haiwan ternakan penduduk kampung baru yang ditenak berhampiran dengan sekitar kawasan rumah penduduk menyebabkan penyakit ini mudah merebak.

Kesan Terhadap Masyarakat Daerah Ulu Selangor

Pembentukan kampung baru Cina telah memberikan kesan terhadap jurang ekonomi antara kaum Melayu dan Cina. Jika dilihat di negeri Selangor, orang Cina merupakan penduduk majoriti yang tinggal di dalam kampung baru. Kampung baru Cina ini telah dilengkapi dengan pelbagai kemudahan asas untuk kegunaan penduduk. Kelengkapan kemudahan asas ini menyebabkan penduduk kampung baru Cina ini bertambah maju berbanding masyarakat Melayu. Prasarana dan kelengkapan yang disediakan oleh kolonial British di kampung baru Cina ini telah membawa peningkatan dan kemajuan komuniti Cina dalam aspek ekonomi dan sosial. Kemajuan ini dicapai kerana perhatian dalam menjaga kebajikan komuniti Cina menjadi agenda utama kolonial untuk menawan hati dan minda agar tidak memberikan simpati kepada pihak komunis.

Tindakan kolonial British yang mengasingkan bidang pekerjaan mengikut kaum telah mewujudkan jurang ketidakseimbangan dan perbezaan kemajuan ekonomi yang besar di antara orang Melayu dan orang Cina. Komuniti Cina dilihat mengalami urbanisasi dan kemajuan yang lebih rancak jika dibandingkan dengan masyarakat Melayu. Penglibatan orang-orang Cina dalam bidang perniagaan, perkhidmatan dan perusahaan amat menggalakkan. Pada tahun 1957, hampir semua orang Cina memonopoli semua bidang pekerjaan kecuali hanya dalam bidang pertanian. Peratusan penglibatan orang Cina dalam bidang pertanian ialah seramai 49.2% sementara orang Melayu seramai 50.8%. (British Adviser's, 1954a). Perbezaan penglibatan di antara orang Melayu dan orang Cina dalam bidang pertanian hanya 1.6% sahaja.

Pihak kolonial British telah mewujudkan bidang pekerjaan di kampung baru, antaranya dalam sektor perusahaan biji timah, pertanian, getah, peniaga dan lain-lain perniagaan. Pembahagian jenis pekerjaan ini adalah biji timah 3.1%, 3.2% pekedai, 10.4% adalah pertanian 20.9% getah dan 6.8% lain-lain jenis pekerjaan. (British Adviser's, 1954a). Di dalam bidang pertanian di Ulu Selangor, dapati 6.8% penduduk kampung baru menjadikan pertanian sebagai mata pencarian utama. Kebanyakan penduduk yang terlibat dalam pertanian ialah orang Melayu (Selangor Secretariat, 1952a). Eksploitasi ekonomi telah dikuasai terutama oleh kaum Cina yang tinggal di kampung baru kerana pihak British memberi penekanan dan bantuan dalam aspek pekerjaan kepada penduduk komuniti kampung baru. Eksploitasi dan kekayaan orang-orang Cina telah menimbulkan rasa tidak puas hati orang Melayu kerana orang Melayu berada dalam kehidupan yang miskin (Chew, 1979).

Kemudahan asas dan infrastruktur yang disediakan oleh pihak British di kawasan kampung baru telah menebalkan permusuhan kaum. Penduduk kampung baru yang didiami oleh bangsa Cina mendapat semua kemudahan yang diperlukan. Keadaan ini menyebabkan orang Melayu merasakan perjuangan mereka yang berkorban membantu British dalam menangani komunis telah diabaikan, sedangkan pihak yang membantu dan menjadi tali barut komunis diberi layanan yang baik. Perasaan benci orang Melayu dengan orang Cina bertambah dengan kekejaman yang dilakukan oleh pihak komunis. Ramai orang Melayu kehilangan keluarga akibat terkorban semasa bertugas dalam pasukan keselamatan atau dibunuh oleh komunis. Masyarakat Melayu menganggap semua orang Cina menyokong ideologi komunis disebabkan oleh ramai ahli komunis terdiri daripada bangsa Cina. Orang Melayu pula lebih ramai menyertai pasukan keselamatan.

Jadual 3: Jumlah Anggota Polis Persekutuan Mengikut Kaum

	Bangsa	Eropah	India	Melayu	China
Jawatan					
Polis Tetap		734	1133	13570	509
Polis Konstabel tambahan		-	209	3023	231
Polis Khas		2	1229	29064	773
Pembantu Polis		1845	1234	42050	4136
Jumlah		2581	3805	87707	5649

Sumber: Department of Information Federation of Malaya (1952). *Communist Terrorism in Malaya. The Emergency June 1948-1952, Chronology of Important Events During the Period June, 1948 to December 1949.*

Berdasarkan jadual 3, jumlah anggota Polis Persekutuan mengikut bangsa, polis berbangsa Eropah adalah seramai 2581 orang, polis berbangsa India seramai 3805, berbangsa Melayu seramai 87707 dan berbangsa China seramai 5649 orang. Perbezaan di antara polis berbangsa Melayu adalah seramai 82058 orang. Pada tahun 1949-1951, hanya seramai 200 orang belia Cina yang berkhidmat dalam pasukan polis daripada 10000 orang yang dikehendaki di daerah Ulu Selangor (Department of Information, 1952). Ketika pihak British membuat kerahan tenaga untuk menyerapkan masyarakat dalam pasukan keselamatan pada tahun 1950, seramai 6000 orang Cina telah lari pulang ke negeri Cina. Pada bulan Januari dan Ogos 1951, seramai 10.000 orang Cina dikenal pasti telah lari ke negeri Cina (Department of Information, 1952). Peristiwa itu telah menimbulkan perasaan benci orang Melayu kepada kaum Cina.

Sikap orang Cina yang dilihat tiada pendirian kerana tidak mengambil bahagian secara langsung dalam usaha yang dilakukan dalam menentang penganas komunis telah menimbulkan syak wasangka kepada orang Melayu. Penglibatan orang Cina dalam pasukan polis yang sangat kurang berbanding dengan kaum Melayu. Walaupun terdapat usaha British untuk mengambil pemuda Cina dalam pasukan polis, namun usaha tersebut mengecewakan. Melihat daripada pola yang berlaku, pihak MCA telah cuba memainkan peranan dalam menyelesaikan permasalahan yang timbul. Pihak MCA telah memainkan peranan yang penting dalam usaha pihak kolonial British dalam mendapatkan rekrut orang Cina untuk menyertai pasukan polis.

I and many other I know would like to see a Malayan Chinese regiment in which we could all prove, once for all, we are capable of martial endeavor. (Means, 1969, ms.139).

Kenyataan yang dikeluarkan oleh Dato Tan Cheng Lock adalah selaras dengan tujuan penubuhan MCA. MCA telah ditubuhkan untuk membuktikan bahawa tidak semua orang Cina menyokong pemberontakan komunis. Walau bagaimanapun, kenyataan Datuk Tan Cheng Lock tidak dapat menstabilkan perasaan orang Melayu. Orang Melayu telah melahirkan luahan tidak puas hati melalui akbar-akbar Melayu.

Pendapat kita lebih cenderung menyatakan bahawa pergerakan kejam kaum komunis di Malaya ini harus tidak akan dihapuskan dengan licin melainkan dengan adanya kerjasama dan bantuan secara benar-benarnya jujur dari kaum Cina. (Majlis, 1950)

Penyelesaian yang strategik telah diambil untuk satu menyelesaikan masalah di antara kaum. Hubungan di antara orang Melayu dan Cina ini penting kerana masalah perpaduan di Ulu Selangor lebih berkisar antara Melayu dan Cina (Morrison, 1949). Untuk merapatkan hubungan orang Cina dan Melayu, satu komiti hubungan kaum telah ditubuhkan pertama kalinya di Pulau Pinang.

Kesimpulan

Peristiwa pengisytiharan darurat akibat ancaman komunis telah menyebabkan berlaku perubahan terhadap dasar kolonial British dalam membasmi ancaman komunis di daerah Ulu Selangor. Pihak kolonial telah mengasingkan penduduk Cina dengan memperkenalkan konsep penempatan semula kampung baru. Pembentukan penempatan kampung baru merupakan langkah yang telah mengubah corak kehidupan dan memberikan implikasi kepada komuniti Cina di daerah Ulu Selangor. Tindakan ini telah berjaya membawa kesan dalam usaha menamatkan pengisytiharan undang-undang darurat yang dikuatkuasakan. Dengan adanya perancangan dan tindakan yang dilakukan oleh Briggs ini, ketegangan ancaman komunis telah berjaya dikurangkan dan komuniti Cina dapat hidup dengan aman. Namun begitu, langkah pembentukan penempatan semula kampung baru Cina melalui rancangan Briggs telah menyebabkan pelbagai implikasi dan masalah terhadap komuniti kampung baru Cina. Masalah yang dihadapi oleh masyarakat Cina di kampung baru telah menimbulkan perasaan tidak puas hati komuniti Cina terhadap dasar pemerintah. Oleh yang demikian, pihak kolonial British negeri Selangor telah cuba melaksanakan langkah yang tersusun untuk mengatasi masalah yang dihadapi oleh komuniti Cina. Keadaan ini berikutan kerana, pihak kolonial sedar tanpa sokongan penduduk di kampung baru, usaha untuk menghadapi ancaman komunis dan menamatkan darurat sukar untuk dicapai. Secara kesimpulannya, rancangan penempatan semula kampung baru ini sebenarnya telah memberikan kesulitan kepada komuniti Cina. Komuniti Cina telah mengharungi pelbagai kesusahan hidup walaupun pihak kolonial British telah cuba memenuhi segala keperluan komuniti kampung baru.

Rujukan

- British Adviser's office Selangor. (1951a). *Minutes of 1st Meeting of Chairmen of Village Committee*. Kuala Lumpur: Government press.
- British Adviser's office Selangor. (1951b). *Minutes of 9th Meeting of the Selangor village Committee*. Kuala Lumpur: Government press.
- British Adviser's office Selangor. (1952). *S.W.E.C. Co-Ordinating Sub-Committee. Minutes of the First Meeting*. Kuala Lumpur: Government press.
- British Adviser's office Selangor. (1953). *Employment In New Villages. Survey of Employment in New Villages In Selangor*. Kuala Lumpur: Government press.
- British Adviser's office Selangor. (1954a). *A General Survey of New Villages*. Kuala Lumpur: Government press.
- British Adviser's office Selangor. (1954b). *Economic Survey of New Villages District of Ulu Selangor*. Kuala Lumpur: Government press.
- British Adviser's office Selangor. (1954c). *Emergency Leaflet, No. 10*. Federation of Malaya. Government Gazette Selangor. Kuala Lumpur: Government press.
- Central Intelligence Agency. (1972). *Intelligence Memorandum communist Insurgency in Malaysia*. CIA Document Services Branch Kuala Lumpur: Government press.
- Chew H.T. (1979). *Masalah Perpaduan Nasional*. Kuala Lumpur: Dewan Bahasa dan Pustaka.
- Colonial Office. (1949). *Emergency Leaflets. Federation of Malaya Weekly News Summary*. Kuala Lumpur: Government press.
- Colonial Office. (1951). *Report on the Emergency in Malaya From April 1950 to November 1951*. Kuala Lumpur. H.T Ross Government Printer.
- Colonial Office. (1952a). *EXC From F.M CID Intelligence. Report August-September*. Kuala Lumpur: Government press.
- Colonial Office. (1952b). *The Enemy in Malaya*. Kuala Lumpur: Government press.
- Department of Information Federation of Malay. (1952). *Communist Terrorism in Malaya, The Emergency with a Chronology of Important Events June 1948- June 1952*. Kuala Lumpur: The Khee Press.
- Department of Statistic. (1957). *Population Census, State of Selangor*. Kuala Lumpur: Author.

- Ho, H.L. (2004). *Darurat 1948-1960 : Keadaan Sosial Di Tanah Melayu*. Kuala Lumpur: Universiti Malaya
- K. B. Selangor. (1963). *Memorandum yang disampaikan oleh penduduk-penduduk kampung Baru Rawang kepada Encik Michael Chen*. Rawang: Government press.
- Kernial, S.S. (1964). *Emergency Resettlement in Malaya*. Singapore: Universiti Singapore.
- Lim, C. S. (1992) *Darurat dan Kampung Baru. Satu Kajian Kes di Daerah Hulu Langat Selangor 1948-1960 (Degree thesis)*. Institut Pengajian Tinggi Universiti Kebangsaan Malaysia: Bangi.
- Markandan, P. (1955). *The Problem of the New Villages in Malaya. Problem of Malaya Series - no 1*. Singapore. Donald Moore.
- Means, G.P. (1969). *Malaysia Politic*. London: Universiti of London press.
- Morrison L. (1949). "Aspect of the Racial Problem in Malaya". *Pacific Affairs*, 11(3), 240.
- Pendapat kita lebih cenderung (1950, March 9) *Majlis*.
- Nyce, R. (1973). *Chinese New Villages in Malaya*. Singapura: Malayan Sociological Research Institute Ltd.
- Selangor Secretariat. (1952a). *Statistical Information Concerning New Village*. Federation of Malaya, Kuala Lumpur: Government Gazette Selangor.
- Selangor Secretariat. (1952b). *Resettlement and the Development of New Villages in The Federation of Malaya*. Kuala Lumpur: Government press.
- Selangor Secretariat. (1952c). *Leaflet Re-alienation Policy In New Villages In Selangor*. Federation of Malaya, Kuala Lumpur: Government Gazette Selangor.
- Selangor Secretariat. (1953a). *New Villages in order of Priority for Survey*. Federation of Malaya, Kuala Lumpur: Government Gazette Selangor.
- Selangor Secretariat. (1953b). *St John Ambulance Brigade, Malaya Relief Teams*. Kuala Lumpur: Government Gazette Selangor.
- Selangor Secretariat. (1953c). *Regulation 17EA (11) The Emergency Regulation 1951*. Kuala Lumpur: Government press.
- Short, A. (1975). *The Communism Insurrection in Malaya 1948-1960*. London: Frederick Muller Ltd.
- Wong, S.K. (1999). *Masalah-masalah Setinggalan di Daerah Hulu Langat Selangor 1948-1960 (Tesis Ijazah Sarjana Muda)*. Institut Pengajian Tinggi Universiti Kebangsaan Malaysia. Bangi.